

四庫全書

集部

欽定四庫全書

歷代詩話卷七十七

歸安吳景旭撰

癸集中之下

泣孝宗

西山日記曰李獻吉郎戶部時上孝宗皇帝萬言書酷似賈長沙劾壽寧侯鶴齡兄弟有張氏語中宮疑其誣已也左右競前激上怒請杖之上持不可語劉忠宣曰

一杖夢陽死矣竟釋之孝宗崩夢陽有十年放逐同梁苑中夜悲歌泣孝宗之句

吳旦生曰獻吉本關中人從父宦遂寓大梁邊廷實所謂却望泰山懷故道即歸梁苑亦他鄉也弘治中應詔陳言二病三害六漸未及鶴齡為外戚驕恣之漸繫錦衣獄旋釋之一夕醉遇鶴齡大市街以鞭梢擊之墮二齒鶴齡隱忍而止後有詩云半醉唾罵文成侯蓋指此也正德初代尚書韓貫道草奏劾八閹

復逮繫劉瑾必欲殺之獻吉出片紙曰對山救我秦
人皆言瑾恨不能致康德涵德涵往獻吉可生也乃
往謁瑾瑾大喜盛稱德涵真狀元為關中增光德涵
曰海何足言今關中自有三才老先生之功業張尚
書之政事李郎中之文章瑾曰李郎中非夢陽耶應
殺無赦德涵曰殺之關中少一才矣明日瑾奏上赦
出蓋獻吉實賴德涵營救而脫後德涵得罪獻吉議
論稍嚴刻馬中錫作中山狼傳詆之

四友齋叢說云弘治正德間李空同何大復康潯西
邊華泉徐昌穀一時共相推轂倡復古道而南京王
南原顧東橋寶應朱菱溪則其流亞也稍後則有毫
州薛西原蕙祥符高子業叔嗣廣西戴時亮欽沁水
常明卿倫河南左中川國璣關中馬西玄汝驥諸人
薛西原規模大復時出入初唐而過於精潔失其本
色高子業是學中唐者故愈澹而愈見其工耳馬西
玄極重戴時亮二公皆工初唐故也左國璣常明卿

宗李翰林皆翩翩欲度驂騑前者也他如王庸之教
李川甫濂則空同門人樊少南鵬戴仲鵠冠孟望之
洋則大復門人譬之孔門其田子方荀卿子之流歟

樂陵令

詩話類編曰何仲默與李獻吉齊名然讀其樂陵令行
一篇亦何嘗規規模古蓋不過就當日時事鋪叙結構
自具古體其詩云山東郡縣一百八無有一城無戰場
到今漂血成野水如山白骨橫秋霜雲臺砌高將不收

投筆亦有書生謀黃金大印賜豪貴白面豈得言封侯
唐朝公卿集如雲平原太守名不聞二十四城見賊走
抗城乃是平原守君不見前者寇到時縣吏州官各亡
命北梁白馬終日行濟上黃旗錯相映不聞開門戰但
聞開門迎吁嗟乎平原太守樂陵令夫此詩以樂陵配
平原亦偶然耳然平原幸脫祿山竟陷希烈許公初成
却敵之功後卒死逆藩二人忠節遭際蓋略相似矣

吳旦生曰當時何李同聲獻吉以觸宦官外戚得罪

仲默因天變上封事曰義子不當畜宦官不當寵蓋
指錢寧劉瑾也又如上書辨獻吉江西之訟奉詔雲
南却象犀珍貝之贈則其正骨剛風兩人如一稟矣
故於樂陵令援往徵令直據其中而出之略無辭飾
按仲默十五舉於鄉又四年舉進士三十九而卒使
假以年其境詣當何如也

送別

藕居士詩話曰何仲默城邊客散重回首愁見孤鴻落

晚汀與嚴維日晚江南望江北寒鴉飛盡水悠悠同一
意而嚴有蕭寥不盡之情然不如太白孤帆遠影碧空
盡惟見長江天際流更黯森此俱本南華送君者自涯
而返君自茲遠之意

吳旦生曰國風燕燕之次章云瞻望弗及佇立以泣
此為千古送別之祖王摩詰詩車徒望不見時見起
行塵東坡別子由詩登高回首坡隴隔時見烏紗出
復沒亦此意也

楊升菴引禽經謂鳥向飛背宿燕向宿背飛莊姜取其背飛之義則又固

於說
燕矣

文章煙月

藕居士詩話曰裴愈送魯秀才南遊詩東吳山色家家
月南楚江聲浦浦風徐昌穀少時所作文章江左家家
玉煙月揚州樹樹花似出此而藻麗過之

吳旦生曰昌穀自琴川徙家吳縣與唐子畏祝希哲
文徵仲號吳中四才子所著有談藝錄文徵仲云文
章煙月之句至今令人口吻猶香閨起山云論者以

為此集中警句雖沈宋無以加皇甫百泉云昌穀自評其詩若棄妻怨妾此特其少年體耳

傲睨

藕居士詩話曰孫太初蓬首提籃直入邵文莊公宅自移榻坐南面典謁駭而報公公知必太初倒屣出見太初不交一言即起去但曰十年吟破吳門月剛得梅花一句詩蓋謂公吳中一人也

吳旦生曰傲睨是太初本色嘗攜鶴入南屏山其新

卜居詩養鶴似嫌雙口累為漁又過一生身許九杞
為買鶴田歲輸糧於萬峰深處因立鶴田券時費子
克罷相訪之值其晝寢故卧不起久之出亦不謝送
及門第矯首東望曰海上碧雲起遂接赤城大奇大
奇子克出語人曰我一生未嘗見此人也余有過歸
雲菴詩坐來風暖紅偏落日極晴空翠欲微海上碧
雲遙接處百年猶向此中歸蓋道其事

石扉

曩白齋詩話曰孫太初歸雲菴詩沙晴竹碧鷗出飛野
老候余開石扉古之人但言柴扉荆扉並無石扉之理
如漢人發哀公塚云初至一戶無扃鑰石牀方四尺牀
上有石几左右各三石人立侍皆武冠帶劒復入一戶
石扉有鎖鑰太初好奇初不知石扉乃墓中石門耳故
詩貴乎允當

吳旦生曰一元字太初不知何許人自云關中嘗棲
太白之巔稱太白山人或云安化王之親支有託而

逃也

徐文長作孫山人考云以抄書役某府中府公為補吏會覲素白金使山人致布政使被盜無

以報命遂亡抵浙此說悞

正德中紹興守劉麟去官卜築吳興之

南坦建業龍霓以按察掛冠隱西溪郡人御史陸崑亦在罷長興吳玳隱居蒙山招太初作湖南雅社稱茗溪五隱戊寅太初來僦居湖南后林村就婚施氏生一女而卒葬道場山之麓而歸雲菴乃其所棲止也中有挂瓢堂按太初嘗以鐵笛鶴瓢自隨顧華玉所謂龍笛吟風鶴瓢酌月鄭善夫弔太初于道場山

中宿歸雲菴詩雲藏伏虎寺花近挂瓢堂

顧華玉為浙左藩時物色太初不可得稍閒輒道衣
幅巾放舟湖上幾行求得之月下有舟泊段橋下一
僧一鶴一童子煮茗笑曰此必太初也移舟就之遂
往還無間

闌干

孫太初詩山中芝草闌干長

吳旦生曰凡以橫斜為義皆可言闌干今太初亦謂

芝草之橫斜耳非指闌楯而言薛珍君題壁詩首宿
長闌干正同此意按階際木勾欄曰闌干字从木作
欄杆蓋以木縱橫為之也如曹植詩月落參橫北斗
闌干蓋言其橫斜貌也白樂天長恨歌云玉容寂寞
淚闌干韻書眼眶謂之闌干淚出於眼亦有縱橫之
意也王元昌云闌干淚不斷之貌亦未盡其義至於左太沖吳都賦金鎡
磊珂珠琲闌干皆言其多也富嘉謨明冰篇云南山
闌干晝夜冰岑參白雪歌云瀚海闌干百丈冰是大

概言其濶遠也

湧幢小品云闌干之名起於北魏南蠻中依樹積木
以居名曰闌干大小隨其家口之數往往推一長者
為王入唐此二字成雅語矣

用脩

藝苑卮言曰楊用脩工于證經而疏于解經博于稗史
而忽于正史詳于詩事而不得詩旨精于字學而屈于
字法求之宇宙之外而失之耳目之前凡有援據不妨

墨守稍涉評擊未盡輸攻

吳旦生曰用脩博覽羣籍研心攷訂武廟閱文獻通
考天文星名有注張亦作汪張下問厯官史館皆愕
然用脩復曰注張柳星也周禮以注鳴者註云注味
也鳥喙也音呪南方朱鳥七宿柳為鳥喙也史記
律書西至于注張漢書天文志柳為鳥喙又湖廣土
官水盡源通塔平長官司入貢同官疑為三地名用
脩曰此六字地名也取大明官制証之凡所攷據手

舊成書焦氏特標百餘種余購求二十年僅得寶其
強半然廣引生瑕亦所不免余詩話中時時正救之
非故取一代之偉人而好為鐫譙音煎也鄙意誠如
弇州所云耳

用脩兩上議大禮疏率羣臣撼奉天門大哭廷杖者
再謫戍雲南永昌衛投荒三十餘年其七十行戍稿
有病中感懷詩七十餘生已白頭明明律例許歸休
歸休已作巴江叟重到翻為滇海囚遷謫本非明主

意網羅巧中細人謀故園先隴癡兒女泉下傷心也
淚流詞人讀之至今血口按在滇時嘗醉鉛粉傅面
作雙丫髻插花門生舁之游行城市諸伎以精白綾
作襪服之酒間乞書醉墨淋漓好事者購歸裝潢成
卷

繼室黃氏有寄夫詩鴈飛曾不到衡陽錦字何由寄
永昌三春花柳妾薄命六詔風煙君斷腸曰歸曰歸
愁歲暮其雨其雨怨朝陽相聞空有刀環約何日金

雞下夜郎久為藝林傳誦惜其詩不多作故用脩亦
云易求海上瓊枝樹難得閨中錦字香

信天翁

蘭廷瑞詩荷錢荇帶綠江空唼鯉含沙淺水中波上魚
鷹貪未飽何曾餓死信天翁

吳旦生曰晁景迂集黃河有信天緣常開口待魚潛
確類書名天然樓玫瑰云水禽有名信天公容齋五
筆云瀛莫二州之境塘灤之上有禽二種其一類鵠

色正蒼而喙長凝立水際不動魚過其下則取之終
日無魚亦不易地名曰信天緣其一類驚奔走水上
不問腐草泥沙啜啜然必盡索乃已無一息少休名
曰漫畫信天緣若無能者乃與漫畫均度一日無飢
色而反加壯大二禽稟性不同如此

子衡

李舒章曰當何李時長於五言古詩者有王子衡薛君
采子衡峻麗得其雄分君采雋潔得其英分宋轅文曰

舒章所言似謂子衡似空同君采近大復也

吳旦生曰子衡君采大抵規摹三謝故五言神似子衡之論詩曰詩貴意象透瑩不喜事實黏滯古謂水中之月鏡中之影可以目覩難以實求是也三百篇比興雜出意在辭表離騷引喻借論不露本情東國困於賦役不曰天之不恤也曰維南有箕不可以簸揚維北有斗不可以挹酒漿則天之不恤自見齊俗婚禮廢壞不曰婚不親迎也曰俟我于著乎而充耳

以素乎而尚之以瓊華乎而則壻不親迎可知不曰
已德之脩也曰余既滋蘭之九畹兮又樹蕙之百畹
畦留夷與揭車兮雜杜蘅與芳芷則已德之美不言
而章不曰已之守道也曰固時俗之工巧兮偃規矩
以改錯背繩墨以追曲兮競周容以為度則已之守
道緣情以灼斯皆包韞本根標題色相鴻材之妙擬
哲匠之冥造也觀此則子衡之於詩固韞義深矣
西山日記云鄭善夫初不識子衡作漫興十首中有

云海內談詩王子衡春風坐徧魯諸生後鄭卒王為
位而哭走使千里致奠為經紀其喪仍刻其遺文

歷代詩話卷七十七

欽定四庫全書

歷代詩話卷七十八

歸安吳景旭撰

癸集下之上

出京

文徵仲致仕出京馬上口占云白髮蕭蕭老秘書倦遊
零落病相如三年虛索長安米一日歸乘下澤車坐對
西山朝氣爽夢回東壁夜窻虛玉蘭堂內秋風早幽竹

黃花不負予

吳旦生曰徵仲到京林見素徧稱於臺省諸公時喬
白巖為太宰夙重見素乃力主張授翰林待詔見素
曰吾此行為徵仲了此一事庶不徒行矣然在翰林
大為姚明山楊方城所窘嘗昌言於衆曰我衙門中
不是畫院乃容畫匠處此耶蓋人之雅俗相懸如此
徵仲有咏蛙詩年來水旱真難卜我已公私付兩忘
寄謝繁聲休強聒吳城明日是端陽殆為姚楊言也

遣懷

彞白齋詩話曰文徵仲有病起遣懷二律蓋不就寧藩
之徵而作也詩云潦倒儒官二十年業緣仍在利名間
敢言冀北無良馬深愧淮南賦小山病起秋風吹白髮
雨中黃葉暗松關不嫌窮巷頻回轍消受爐香一味閒
經時卧病斷經過自撥閒愁對酒歌意外紛紜知命在
古來賢達患名多千金逸驥空求骨萬里冥鴻肯受羅
心事悠悠那復識白頭辛苦服儒科

吳旦生曰徵明初名璧以字行更字徵仲以諸生歲貢入京授翰林院待詔三載謝病歸按唐王以黃金數笏遣一承奉求畫徵仲堅拒不見其使逡巡而去寧庶人以厚幣招致海內名士徵仲謝弗往唐子畏往佯狂而返識者兩高之日本貢使踵門求見具冠服南面受拜而却其贄曰此國體也晚年衣紅絨衣戴捲檐帽坐白紙窻下擁爐曝背劇談疊疊坐客皆移日忘去卒之時方為人書志石未竟欠伸閣筆端

坐而逝

二子彭字壽承國子監博士嘉字休承和州學正張伯起云文太史詩未必上超開元佳者亦不失大厯後生小子信口詆訾迨國博郡博之作謂之文家詩今觀壽承妾家住近江淹宅曾讀銷魂別賦來休承五百年來幾摹本翠禽猶在最高枝等句及張公善權二作亦各有致可盡訾乎太史女嫁王子美者更好學號為博洽亦能詩所作明妃曲尤傳

刻竹

文徵仲刻竹詩蕭蕭落木帶江干翦翦幽花過雨斑豈
意旅遊逢九日共來把酒看三山

吳旦生曰徵仲與許彥明同遊金陵嘉善寺因題詩
竹上後書丁亥九月九日徵明同子嘉彥明同子穀
來休承即刻詩大竹上好事者取詩竹製筆筒今尚
在王丹丘家

按富川有東坡竹蓋公嘗以題壁餘墨洒竹上而不

滅新篁枝葉皆有墨痕後百十八年謝疊山謫居是地其竹尚然景泰中杜用嘉詩云重華南去不南還二女啼痕在竹間亦有富川蘇子墨至今枝葉尚斑斑

獨退

清暑筆談曰高子業詩衆女競閨中獨退反成怒夫爭妍取忌有之也而獨退成怒者豈不以衆邪醜正世忌太潔耶故楊誠齋有云聲利之場輕就者固不為世所

恕蔡定夫是也不輕就者亦不為世所恕朱元晦是也
吳旦生曰少室山房詩評云子業視李何後出而其
五言古律之工不欲作今人一字在唐不減張曲江
韋蘇州矣陳約之序其集云洪武初沿襲元體頗存
纖詞時則高楊為之冠成化以來海內和豫縉紳之
聲喜為流易時則李謝為之宗及乎弘治文教大起
學士輩出力振古風盡削凡調一變而為杜時則有
何李為之倡嘉靖改元後生英秀稍稍厭棄更為初

唐之體家相凌競斌斌盛矣夫意製各殊好賞互異亦其勢也然而作非神解傳同耳食得失之致亦略可言何則子美有振古之才故雜陳漢晉之詞而出入正變初唐襲隋梁之後是以風神初振而縟靡未刊今無其才而襲其變則其聲粗厲而畔規不得其神而舉其詞則其聲啾緩而無當彼我異觀豈不更相笑也論國初及弘正而下格調之變無如此序之精當者唐元薦云明詩莫盛於弘治藝苑則李懷麓

張滄洲為赤幟而和者多失於流易山林則陳白沙
莊定山為眉目而議者或以為旁門李何一出變而
學杜正變雲擾剽竊雷同比興漸微風騷日遠箴其
偏者唐應德也嘉靖初更為六朝初唐而纖艷不遑
嗶緩無當作非神解傳同耳食議其後者陳約之也
錄此二序其時之風會可槩見矣

子安

藝苑卮言曰皇甫子安之博覽古選頗勝子循之禪棲

近體為佳子安卒蔡子木以詩哭之云五字沈吟詩品
絕一官憔悴世塗難可謂實錄

吳旦生曰皇甫湊字子安與其弟沆字子循濂字子
約皆登嘉靖間進士其兄冲字子浚亦登鄉薦王元
美所云太原兄弟並擅菁華也子循寄懷子木云日
日江頭聞送客每於詩卷恨錢郎蓋子循與子木同
官陪都亦如唐時送行詩非錢起郎士元不足取重
也

堯山堂外紀云王元美為比部郎嘗與蔡子木徐子
與吳明卿謝茂秦飲謝時再遊京師詩漸落子木數
侵之已被酒高歌其夔州諸咏亦平平耳甫發歌明
卿輒鼾寢鼾聲與歌相低昂歌竟鼾亦止為若初醒
者子木面色如土子與復與子木論文不合而罷後
五歲所而子木以中丞撫河南子與守汝寧明卿謫
歸德司理張肖甫謫裕州同知皆屬吏也子木張宴
備賓主身行酒炙曰吾烏得有其一以慢三君子尋

具疏薦之

受卷

張涇川贈嚴維中詩登科豈必傳三唱受卷曾知讓一
籌

吳旦生曰弘治乙丑張涇川為受卷官見維中制策
擊節稱賞既而不預一甲之選為之太息後維中使
粵過之涇川贈此詩維中酬云往事殷勤勞晤語非
才流落負心知按維中通籍後屏居鈴山之東堂折

節讀書與名流往來人望翕然歸之何至得君專政
屠戮忠良後世唾詈為權奸首也

玉堂叢語云高中玄為嚴維中門生嚴自內直回往
候之適其鄉人如牆而立嚴一至衆張拱以前高曰
有一雅謔敢為老師道否韓昌黎二語與目前事相
類嚴曰何語曰大雞昂然來小雞聳而待也嚴亦大
笑人素嘲江西人為雞故云余觀詩說雋永李伯紀
為行營使王仲時張仲宗俱為屬王頎長張短小白

事相隨一館職戲曰大雞昂然來小雞聳而待劉宋時已有此謔

贈盧

張王屋贈盧次梗詩左驂猶有胥靡贖鼓吏終成處士名

吳旦生曰陳卧子稱此聯用事切當蓋指濬獄也按次梗雄於貲使酒罵坐嘗為具召邑令令乃日昃至次梗醉卧不能具賓主令心銜之會醉榜其役夫旬

日役夫夜壓於牆隕遂禽治次梗坐繫獄獄中感奮
著幽鞠放招賦以自廣謝茂秦挾其賦走長安見諸
貴人絮而泣平湖陸與繩為濬令平反得脫故次梗
寄茂秦云魯連自是紫烟客倜儻長揖二千石一朝
談笑解聊城東入滄溟眇無跡而茂秦有感次梗云
燕霜終古憤梁獄昔年書世事疎狂裏交情患難餘
茂秦

藝苑卮言曰謝茂秦曳裾趙藩嘗謁崔子鍾崔有詩贈

之後以救盧次梗北遊燕刻意吟咏遂成一家句如風
生萬馬間又馬渡黃河春草生皆佳境也其排比聲偶
為一時之最第興寄小薄變化差少嘗謂其七言不如
五言絕句不如律古體不如絕句又謂如程不識兵部
伍肅然刁斗時擊而寡樂用之氣

吳旦生曰茂秦居鄴邸為趙康王客康王薨其曾孫
穆王復禮之潘景升旦史云趙王雅愛茂秦詩從王
客鄭若庸得竹枝詞十章命所幸琵琶妓賈扣度而

歌之萬歷癸酉冬茂秦從關中還過鄴偕若庸見王
王宴之便殿酒行樂作王曰止命絙瑟以琵琶佐之
聲繁屏後王復止衆妓獨奏琵琶方一闋茂秦傾聽
未敢發言王曰此先生所製竹枝詞也譜其聲不識
其人可乎命諸妓擁賈姬出拜光華射人藉地而竟
竹枝十章茂秦謝曰此山人鄙俚之辭安足污王宮
玉齒請更製竹枝詞以備房中之奏王曰幸甚茂秦
老不勝酒醉卧山亭下王命姬以衽代薦承之以肱

明日上新竹枝詞十四闋姬按而譜之不失毫髮元
夕便殿奏技酒闌送客即盛禮而歸賈於邸舍茂秦
載以遊燕趙間逾二年而逝姬奉柩停大寺之旁每
夜操琵琶一曲歌茂秦竹枝詞必慟絕而罷

萬峰

堯山堂外紀曰謝茂秦遊天壇賦七言一律天畔飛霞
照萬山尋易山字為峰遂成絕句云度嶺攀崖自一節
黃冠竹下偶相逢振衣直上昇仙石天畔飛霞照萬峰

吳旦生曰詩家易字最為緊要余於庚集高詩中論之至有兩字一義而用此則安用彼則否尤闕微妙如柳文暢詩亭臯木葉下謝玄暉詩雲中辨烟樹不可作亭臯樹葉下雲中辨烟木蓋木之與樹山之與峰其義一也試取數語細哦之覺舌本間有斷斷不可混下者此無他響與啞之別也

外紀又云有客問作詩之法於謝茂秦請出一字為韻以試心思乃得天字遂成三十六句云林開鳥雀

天鵝號月黑天春陰欲雨天斜陽未昝天明河半在
天一棹劃江天荷影亂湖天江清魚在天蛾影瘴江
天千江各貯天海氣混茫天霜冷菊花天雲慘戰場
天野燒氣蒸天鷹揚朔漠天馬見渥洼天神龍穴海
天湖抱岳陽天飢饉叫雪天鐘磬徹諸天心空靜裏
天鶴夢不離天濁水混青天東南百越天江波不定
天雲蘿隱洞天丹氣夜薰天登嶽上捫天隴樹插秦
天霜清瘴癘天氣變漢家天水開鴈沼天海簸大鵬

天嶺斷五羊天微茫晝裏天人老醉鄉天又用天字
起得十二句云天馬行無迹天覆空青色天高籠鳥
心天陰鬼火亂天寒鷹力健天聚峨眉雪天勢海相
吞天風助鬪虎天山雄漢塞天長接鄧林天晴百鳥
散天垂四野青又第二用天字得十二句云井天開
地鏡鈞天奏太和蜀天低劍閣雲天渾一色木天通
夜鼠羅天昭象緯楚天三峽斷海天騰蜃氣諸天空
色界江天月兩分霜天紅葉老通天鳥道寒又第三

用天字得十二句云夜爽天街露孤峰天外出風暖
天絲度靜中天籟起隱見天河影峽開天一線漢北
天常雪日高天更青霞明天姥峰禪林天雨花雲疎
天色澹井平天影出又第四用天字得十二句云風
響叅天樹鑿嶺蜀天開混沌是天胚萬物各天機出
塞胡天盡龍鬬海天翻鴈得楚天春虹截江天碧王
氣浮天闕蹄涔縮天影秋氣澄天宇到海得天多客
謝而去顧茂秦笑曰子何太泄天機耶

簡倨

堯山堂外紀曰李于鱗為陝西按察使鄉人殷者來巡撫嘗下檄于鱗代撰奠章及送行序于鱗不樂移病乞歸殷留之入謝乃請曰臺下但以一介來命不則尺蹠見屬無不應者似不必檄也殷謝過有所屬撰以名刺往久之復移檄于鱗上疏乞休不待報竟歸吏部惜之用何仲默例許養疾疾愈起用蓋異數也于鱗歸杜門自兩臺監司以下請見不得去亦無所報謝以是得簡

倨聲又嘗為詩云意氣還從我輩生功名且付兒曹立諸公聞之有欲甘心者

吳旦生曰于鱗守順德時訪胡提學乃蜀人也問之曰楊升菴健飯否胡云升菴錦心繡腸不若陳白沙鳶飛魚躍也于鱗拂衣去後按察闕中過許中丞問今能詩何人于鱗云惟王元美其次宗子相許請子相詩觀之于鱗勃然曰夜來火燒却蓋其性行簡倨如此然觀陳眉公語陳卧子云少時見元美言往者

燕邸之會于鱗詩必晚出見他人有工者即廢已作
不復示人此則于鱗下懷處也

新河

堯山堂外紀曰舊河通瓠子新浪漲桃花元人張仲舉
詩也嘉靖中河決徐沛大司空萬安朱公衡排衆議改
築新渠百年河患一旦屏息海內名士咸有頌章李于
鱗詩云河堤使者大司空兼領中丞節制同轉餉千年
軍國壯朝宗萬里帝圖雄春流無恙桃花水秋色依然

瓠子宮太史但裁溝洫志丈人何減漢臣風春流一聯
王元美亟稱之以為不可及然實用張語而意稍不同
後元美過新河亦有詩呈朱公云日出烟空匹練飛大
荒中劃萬流依連山盡壓支祁鎖逼漢疑穿織女機九
道徵輸寬氣象六軍容物迴光輝甘棠欲讓金隄柳曾
護司空却蓋歸論者以支祁織女一聯又在桃花水瓠
子宮之上

吳旦生曰元美謂春流無恙桃花水秋色依然瓠子

宮不知者以為上單下重按三月水謂之桃花水為害極大此聯不惟對偶精切而使事用意之妙有不可言者余觀杜詩三月桃花浪趙注引韓詩溱與洧方渙渙兮注謂三月桃花水下時也希注引漢溝洫志來春桃花水盛顏師古注謂月令仲春之月始雨水桃始華蓋桃方華時既有雨水川谷氷泮衆流猥集波瀾盛長故謂之桃花水余喜此兩注最得源委若東坡詩桃花春浪孤舟起程注但引杜欽傳不知

有韓詩月令事矣

續停驂錄云黃河水異凡立春後凍解候水初至凡

一寸則夏秋當至一尺謂之水信水衡記正月二月名凍解水

三月曰桃花水春末曰菜花水四月末曰麥黃水五

月曰瓜蔓水水衡記瓜延蔓故名瓜蔓水六月中旬後曰樊水衡作樊

山水七月曰豆花水八月曰荻苗水水衡記荻花故名荻苗水九

月曰登高水十月曰復槽水水衡記水落復故道謂之復槽水十一

月十二月曰感凌水水衡記水斷復結謂之感凌水非時汎漲曰客

水其勢移猗橫注岸如刺毀曰劓岸漲溢踰防曰抹岸掃岸故朽潛流刺其下曰搨岸浪勢旋激岸土上隤曰淪捲逆漲曰上展順漲曰下展直流中屈曲橫射曰徑甯水猛驟移其將澄處望之明白曰拽白又曰明灘其汨起處輒能溺舟者曰薦浪水水退淤澱夏則膠土肥腴初秋則黃減土頗為壤深秋則白減土霜降後皆沙也

于鱗首云河隄使者大司空蓋空字與同雄宮風相

叶余按司空之空不當作平聲韻叶也詩話類編云
空字有四音平聲音枯公切說文竅也天曰太空沙
名方空從平聲上聲音孔考工記函人眡其鑽空舜
紀穿為匿空旁出莊子壘空之在天澤注小穴也張
騫傳樓蘭姑師小國當空道柳子厚祭張舟文空道
北出式遏蠻陬大宛傳張騫鑿空皆音作上聲去聲
音控詩不宜空我師論語其庶乎屢空揚子酒誥之
篇俄空焉唐詩潭影空人心又天空霜無影又十八

人名空一人皆音去聲入聲音窟古者穴地穿崖而居謂之土空司空官名居四民時地利也故曰司空周禮注司空主國空地以居民空地即窟地也天上星有土司空亦映地之土穴詩曰陶復陶穴又曰為改歲入此室處室即土空也冬時萬物閉藏故司空之官屬冬據此則于鱗直作平聲叶者未深考耳

白雪樓

李于鱗酬李東昌詩江湖盤薄有能事畫我山中白雪

樓

吳旦生曰于鱗自秦中挂冠搆白雪樓所著名白雪樓詩集東昌李使君子朱讀其集繪為圖以寄之于鱗酬贈此詩按于鱗自謂樓在濟南郡東三十里許鮑城前望太麓西北眺華不注渚山大小清河交絡其下左瞰長白平陵之野海氣所際每一登臨鬱為勝觀自題白雪樓云大清河抱孤城轉長白山邀返照迴謝魏使君云白雪新題照畫闌鮑山堪此對盤

桓王元美乃謂樓上于鱗讀書而其下甚穢可笑則
又何耶陳眉公云于鱗死其子駒後亡家貧白雪樓
已鬻他人矣

大陸

李于鱗登真定大悲閣詩坐來大陸當窻盡不斷滹沱
入檻流

吳旦生曰大陸在真定府寧晉縣即禹貢陸澤之地
大河所經受滏音注滏音注沙滌音注諸水夏潦之時漳水

潯沱南北交注其澤東西徑三十里直接隆平任縣
俱百餘里漳潯二水遠陲可以耕種後漢書鉅鹿郡
有大陸澤呂氏春秋九藪趙之鉅鹿高誘注云廣阿
澤是也按廣阿大麓同澤異名舊志因尚書納于大

麓之文遂有堯臺象城二迹

隋圖經云大麓有堯臺
高與縣城等世謂堯禪

舜處也地里志云大麓有象
城縣舜弟象所封之邑也

故于鱗同元美登郡樓

詩銜孟大麓來秋色倚檻邢臺過白雲元美有于鱗
邀登郡樓詩不盡天風吹大陸何來嶽色滿邢州時

于鱗守順德古名邢州也偶見後之倣七子聲口者
動言大陸竟作平原廣野之通稱特詳釋之

五子七子

王元美贈吳明卿詩無妨中散來千里更喜延之詠五
君又贈姚匡叔詩見數八公君第幾空傳七子世無多
匡叔以道術為王
客惓惓七子之盛

吳旦生曰嘉靖間元美初成進士隸事大理山東李
伯承伯承為通之于鱗遂結社都下作五子詩東郡

謝茂秦榛濟南李于鱗攀龍吳郡王元美世貞長興
徐子與中行廣陵宗子相臣南海梁公實有譽於時
稱五子實六子也已而茂秦與于鱗隙遂去茂秦而
進武昌吳明卿國倫又益以南昌余德甫曰德銅梁
張肖甫佳肩則所謂七子者也又有新蔡張助甫九
一與德甫肖甫相繼而入七子社者此元美所云吾
黨有三甫也先是弘正中北地李獻吉夢陽信陽何
仲默景明武功康德涵海鄠杜王敬夫九思吳郡徐

昌穀禎卿王子衡廷相濟南邊廷實貢亦稱七子詞
林於是有先七子後七子之目矣逮于麟沒元美引
進益多如蒲圻魏順甫袁欽郡汪伯玉道昆從化黎
惟敬民表之屬稱為後五子崑山俞仲蔚允文濮州
李伯承先芳孝豐吳峻伯維嶽順德歐楨伯大任之
屬稱為廣五子至於常熟趙汝師用賢雲杜李本寧
維禎南樂魏懋權允中四明屠長卿隆金華胡元瑞
應麟遂稱末五子矣

牛腰

王元美詩囊裏牛腰詩卷麤他年鶴背重還無何如負局先生好只負真形五岳圖

吳旦生曰時有樓道人以詩卷遍索名公題贈故元美題此謂之李太白詩書禿千兔筆詩載兩牛腰陸放翁詩題詩又滿牛腰束采藥常攜鴟背鋤萬厯中程孟陽詩未煩馬汗曾充棟不及牛腰免借車

青雲

王元美詩我自青雲甘薄宦誰當白雪問相思

吳旦生曰王李類以青雲白雪作對如于鱗詩即今
病借青雲起何用詩傳白雪音元美詩青雲坐向論
心失白雪歌容攘臂驕余觀京房易占云青雲所覆
其下有賢人隱續逸民傳云嵇康蚤有青雲之志衡
陽王云身處朱門而情在江湖形入紫闥而意在青
雲梁袁彖贈隱士庾易詩白日清明青雲遼亮阮籍
詩抗身青雲中網羅孰能施李白詩所以青雲人高

歌在岩戶皆作隱逸用如顏延年五君咏云仲容青
雲器注言器識高遠也即史記閭巷之人欲砥行立
名非附青雲之士惡能施於後世此亦非為仕路言
也今之指功名為青雲何哉然在唐時白樂天聞元
八改官詩交親盡在青雲上鄉國遙拋白日邊方干
送侯郎中赴闕詩青雲舊路歸仙掖白鳳新詞入聖
聰要其始由於揚雄解嘲云當塗者升青雲失路者
委溝渠後遂以為故實耶

二王

少室山房詩評曰予與友人拈二王律詩長公有花裏
鳴絃千嶂色月明飛舄萬家春次公則飛舄夜懸天姥
夢栽花春映赤城標長公有悲歌碣石虹高下擊筑咸
陽日動搖次公則星近長安多聚散雲深碣石易浮沈
真勦敵也

吳旦生曰敬美弱冠稱詩李于鱗呼為小美嘗致書
元美云小美思火攻伯仁奈何不善備之余德甫寄

元美兄弟詩吳中二美得王郎余觀他人之尸祝元
美卑者未窮其蘊高者或溢其量總不若敬美之遺
兄書為定論也書云詩道拓基於北地極深於濟南
然而採蓄之途尚狹游矯之神未充兼此二家登乎
彼岸古惟陳思子美今則吾兄庶幾吾兄境雖神詣
然亦學以年邵白雲之什雖經刪改未離矜莊逮乎
讞獄三輔建節青土字字快心言言破的性靈效矣
變化見矣擊節賞勝每恨古人無此快句然謂稍遜

古十九首意者亦坐斯媿居憂以後縱心觸象取材
愈博演教彌神或鬼篆虵文冥搜六合之外或牛溲
馬勃近取咫尺之間離觀則邈若無關湊泊則天然
一色大都字險者韻必妥韻奇者聲必調天壤之間
若為預設此真藝林之絕技律家之玄造也甚或直
指故陳纖詞間作雖淮陰用兵多多益善瞿曇拈指
頭頭是道然弟臆陳則謂周行所示未流宜慎何者
恐比丘無飯鉞之能效羅什而有室也所以耶襄諸

篇特寡游戲簡善譔以示娛弘大雅而垂訓意在茲乎

秦聲

王百穀曲中詩云一半秦聲半楚聲秦娥調瑟楚娥箏
吳旦生曰李龜年至岐王宅聞琴聲曰此秦聲良久
又曰此楚聲主人入問之則前彈者隴西沈妍後彈
者揚州薛滿也百穀用此

懷妾

王伯穀答袁懋中問病詩云書生薄命元同妾丞相憐才不論官

吳旦生曰王元美有和伯穀懷出妾詩妾與書生俱薄命花隨春帝不長情蓋指此也嘉靖間懋中執政伯穀遊北雍閣試瓶中牡丹詩其牡丹名相紫袍伯穀乃作一聯云色借相君袍上紫香分太極殿中煙懋中賞歎呼詞館諸公數之曰公等能道得王秀才十四字邪引為記室懋中卒無子伯穀渡江哭其墓

有詩云伯道遺孤安得有中郎少女亦曾無又云山
上杜鵑花是鳥墓前翁仲石為人其聲淒婉不堪竟
讀

文苑瀟湘云詩不嫌巧只要巧得入妙如伯穀壽張
伯起令母詩共道麻姑如好女笑看菜子似嬰兒蓋
張母九十而健伯起亦七十故云題梅衡湘平朔方
卷詩美人學舞魚腸劍廝養能開兕角弓都是實事
描寫得佳曾寓陳令君所陳觴之樓上遂作詩二句

云多君下榻能留穉有客登樓亦姓王用陳蕃王粲
事化腐為新

枇杷

詩話類編曰莫廷韓過袁履善先生適村人獻枇杷果
誤書琵琶字青浦令屠長卿續至長卿曰琵琶不是這
枇杷袁曰只為當年識字差莫即云若使琵琶能結果
滿城簫管盡開花長卿賞譽再三遂定交

吳旦生曰琵琶二字按說文作枇杷又釋名枇杷本

出於馬上所鼓也推手前曰枇引手却曰杷及觀胡
曾贈薛濤詩萬里樓臺女校書琵琶花下閉門居金
人馬定國雪霽詩獨往南塘探春色琵琶花下竹雞
鳴則枇杷二字又作琵琶豈古字可互通邪書之以
為博雅者談助云

琵琶字本作枇把搜神記作犢婆


生日

徐文長上胡宗憲生日詩幾年載筆承英盼四海為家

只浪授簡真慙稱記室逢人交慶識荊州

吳旦生曰胡宗憲督師平倭文長管書記嘗戴敝烏巾衣白布漈衣長揖入坐縱談時務督府勢嚴重勿顧也嘉靖己未秋九月宗憲生辰故上詩述其幕下之情後宗憲下請室文長發狂尋病卒袁中郎遊越得其殘帙示陶周望相與激賞且謂其胸中有一段不可磨滅之氣英雄失路托足無門之悲故其詩如嗔如笑如水鳴峽如種出土如寡婦之夜哭羈人之

寒起其集自是盛傳於世余按宗憲嘗譙將士爛柯
山文長作詩云萬里封侯金印大千場博戲綵毬新
時沈嘉則同在幕亦宴山上請為饒歌十章援筆立
就釀酒高吟至狹巷短兵相接處殺人如草不聞聲
宗憲起捋其鬚曰何物沈生雄快乃爾知其時辟置
幕府者率皆國士



歷代詩話卷七十八

欽定四庫全書

集部

歷代詩話卷十九

詳校官侍讀學士臣陸伯焜

侍讀臣孫球覆勘

總校官知縣臣繆琪

校對官編修臣吳壽昌

謄錄監生臣孫大森

欽定四庫全書

歷代詩話卷七十九

歸安吳景旭撰

癸集下之中

襲前

藕居士詩話曰袁中郎力糾明詩藝林咸允十集出幾
於紙貴其謂不襲前人一字一意恐未盡然略舉一二
如庖人供薄餅稚子獻香梨襄陽有厨人具雞黍稚子

摘楊梅落絮粘行牘老杜有落絮粘行蟻倦來看洗馬
老杜有晚涼看洗馬感郎千金顧古詩有感郎千金意
去日翟公猶有客到來潘岳已無花鐵女有舊曲聽來
猶有恨故園歸去已無家珠簾欲度聞仙語佺期有經
聲欲度聞天語古屋繫龍兒老杜有古屋畫龍蛇東風
吹綻紅亭草東風吹暖婁江樹唐人有東風吹綠瀛洲
草文雅王元美清新孫太初即老杜之清新庾開府俊
逸鮑參軍也六朝舊事殘鐘外即楊載之六朝舊恨斜

陽外也大約此等偶襲古亦不避三百篇亦有之不足為病

吳旦生曰中郎詩一變李何之習灑灑蕩蕩眼膜頓洗至其自謂不襲與必欲指其襲皆是習氣未除要之詩人工拙全不在此余最愛其別王百穀一律云河上清霜鴈字斜西風匹馬又天涯錦帆涇遶郎官舍冠子橋通處士家好事每供梅月水清齋長試穀前茶東鄰不是無姝子眼底何人解浣紗清疎絕俗

中郎與百穀身分俱出

謫歸

湯義仍送臧晉叔謫歸湖上詩却笑唐生同日貶一時
臧穀竟何云

吳旦生曰晉叔先生為余之外舅從父行有晉風縱
情任誕官南國子博士時余族祖湧瀾公亦為南駕
部郎兩人每出必以棋局蹴球懸之輿後此義仍所
謂深燈夜雨宜殘局淺草春風恣蹴球也晉叔又與小

史衣紅衣並馬出鳳臺門中白簡罷官時唐仁卿以
議文廟從祀偕貶同日出關故義仍有唐生臧穀之
句然義仍所著詞曲四夢晉叔謂是架上書非場上
調遂加芟潤義仍憤然作絕句擬之摩詰雪蕉矣

秋草

甲乙剩言曰頃入都詞人益寥落無幾而所見篇什惟
吳允兆秋草十詩及汪明生秋閨雜咏翼翼可誦其他
惟柳陳父元夕一結云看他何處不娛人及楊不棄谿

上偶成沙頭小鴨自呼名而已至如朗哉公翰諸君都不復進

吳旦生曰族祖允兆公秋草十章皆堪傳誦而八月幽并百草黃一章尤為選家所重蕪善臨池好事者取公手揮秋草諸篇鐫之石肖公像於幀首野衣幅巾儼然癯叟也公集名射堂詩抄余之外祖母為公姪女詩得家法盛年孀節所著憂餘草哀餘草行世今選集所載吳淑貞是也惜二刻與射堂刻俱銓擇

失當遺逸猶多以俟訂定

養紙薰衣

李本寧詩銀光紙養芙蓉粉金縷衣薰荳蔻香

吳旦生曰嘗閱升菴集有云養紙芙蓉粉薛濤事薰
衣荳蔻香霍小玉事而本寧為此聯亦比偶中佳語
也崇禎中單尊僧詩荳蔻篆雙叅佛罷芙蓉箋界學書
成又全用其語若沈景倩詩養紙芙蓉粉似脂瓠犀
濡墨寫新詩沈令則詩芙蓉膩粉養成堆待取綾紋

十樣來劉伯宗詩他年覓得芙蓉粉尚欲相期九萬
枚則近時習用之矣

弄

虞長孺滿覺弄看花詩玉岑西望逼瑤城月路青青桂
影橫

吳旦生曰杭州南屏山之深處有名滿覺弄迤延數
里皆植桂花崇禎癸酉秋八月嵇年祖凝宇公同先
子往遊旭率諸弟操壺觴以從得窮其勝先子問名

弄何義旭前曰高下桂枝有石逕可通如人家之屋
下小巷呼之為弄也離騷云五子用失乎家衙揚子
云一闕之市皆訓巷即當作弄集韻弄厦也屏也又
作屏蓋即今稱耳字書有一字而倍為兩字者如因
衙字呼弄唐是也俗語有兩字而呼為一字者如合
衙衙為衙字是也南齊書蕭詵接鬱林王出西弄弑
之此亦宮中別道如永巷之類隋書南寧有小勃弄
大勃弄元經世大典有火衙注音弄王元美遊洞庭

山記有風弄又弇山園記有鐵猫弄一云嚴陵瀨有風七里無風七十里土人謂之瀧或訛為籠皆當從此弄字楊升菴云弄者蓋衍字之轉音耳敬述前聞以對先子顧諸弟而笑曰汝兄之言辨

嬾婦

曹能始桂州風謠二首末云嬾婦田間過忙將織作陳吳旦生曰自注嬾婦山猪也食人田禾以機杼之物陳設則止按述異記淮南有嬾婦魚俗云昔陽氏家

婦為姑所怒溺死化為魚

象州異物志作死為獸

脂可燃燭以

之照鳴琴博弈則爛然有光及照紡績則不復明說
文鮒魚酉陽雜俎奔鯀一名濁草木子云即江豚也
丹鉛續錄魴魚即嬾婦魚也多膏以為燈佛經謂之
饒燈開元天寶遺事號為饒魚燈則能始所稱山猪
即此類物理固有然者

三雅五經

李君實作飲酒詩登樓客在傳三雅問字人來揖五經

吳旦生曰魏文帝典論云靈帝末斗酒直萬金劉表

一子好飲乃製三爵大曰伯雅

注云一斗一云受七勝即升字

次曰

中雅

注云五升一云受六勝

小曰季雅

注云三升一云受五勝

蓋君實用

此而王粲依劉表作登樓賦故井及之耳潘遠紀聞

譚云閭中有人修池得三銅器狀如杯盞上各有二

篆字一云伯雅二云仲雅三云季雅乃名此池為三

雅池趙德麟云恐是盛酒器非飲器也曾存之云古

人軀幹大升合小王仲弓傷寒證治論湯劑注云古

方三兩當今一兩三升當今一升東觀漢記今日歲
首請上雅壽于志寧詩俱裁七步咏共傾三雅盃劉
孝綽詩共搗雲氣藻同舉雅文盃

廣韻盃字注云酒器盃即雅字也方言盃間盃盃皆
柝也秦晉之郊謂之盃所謂伯盃也其大者謂之間
吳越之間曰盃齊右平原以東或謂之盃柝其通語
也盃音雅間呼雅反盃音章盃音摩

侯鯖錄云陶人之為器有酒經焉晉安人盛酒似瓦

壺之製小頭環口脩腹受一斗可以盛酒凡饋人則書云酒一經或二經至五經焉他境人有遊於是邦不達其義聞五經至東帶迎於門知是酒五瓶為五經焉

虎落龍鍾

鍾伯敬編籬詩縛柴成虎落澆竹汰龍鍾

吳旦生曰按鼃錯論邊塞事云為中周虎落注謂若今用竹虎以竹篾相連遮落于塞要下以沙布其表

旦視其跡知寇來也揚雄羽獵賦虎落三峻以為司馬一作虎路古音略云路音落疊也謂以繩周繞之世芳詩不須防虎落聊復策龍韜

戲瑕云竹名龍鍾而唐詩雙袖龍鍾淚不乾則直以貌老人衰相矣然竹實有名龍鍾者羅浮山第三十一嶺半是巨竹皆七八圍長一二丈謂之龍鍾竹余按杜子美寄高適岑參詩何太龍鍾極於今出處妨薛蒼舒注云龍鍾竹名謂其年老如竹之枝葉搖曳

不自禁持取此義也殊不知南越志與羅浮山記所載龍鍾竹乃是希世之異物馬融長笛賦惟籠鐘之奇生于終南之陰崕是也安得以年老取義注杜耶後人反援為故實而伯敬不攷亦漫作此句

緇素雜記云古

語有二聲合為一字者如不可為巨何不為盍從西域二合之音切字之元也龍鍾潦倒正二合之音龍鍾切癰字潦倒切老字欲言癰欲言老即以龍鍾潦倒言之

伯敬詩清迥自異全用歐九飛蓋橋翫月筆法與譚友夏選古唐詩歸一時翕然稱之其後訾者日起吳

逸一云讀詩歸知鍾譚善索隱每取奇於句字之間
至於全章主意却不理會宜不能服大匠心也此論
切中其弊

利瑪竇

譚友夏過利西泰墓云私將禮樂攻人短別有聰明用
物殘

吳旦生曰萬厯辛巳大西洋奉耶蘇教者利瑪竇自
歐羅巴國航海九萬里入中土始到肇慶劉司憲持

其貢表上聞所貢耶蘇像萬國圖自鳴鐘鐵絲琴等
上啟視嘉歎命給廩賜第宣武門內建天主堂供耶
蘇像其上按耶蘇釋略云耶蘇譯言救世者尊主陡
斯降生後之名也陡斯造天地萬物無始終形際因
人始亞當以阿襪言不奉陡斯陡斯降世拔諸罪過
人漢哀帝二年庚申誕於如德亞國童女瑪利亞身
而以耶蘇稱居世三十三年般雀比刺多以國法死
之死三日生三日昇去死者明人也復生而昇者

明天也越庚戌瑪竇卒詔以陪臣禮葬阜成門外二里嘉興觀之右

白小

譚友夏詩夕煙河上黃茅屋秋雨橋邊白小魚

吳旦生曰老杜白小詩白小羣分命天然二寸魚細微霑水族風俗當園蔬友夏評云形容細魚賤而多妙絕蓋老杜咏物之工高出千古友夏深所矜賞因以入咏韻語陽秋言白小與菜無異豈復有厚味哉

故白樂天亦有下飯腥鹹白小魚之句魚始二寸已就烹魚之窮也寒士又從而食之其窮抑甚又陸放翁詩羹釜帶鱗烹白小蓬門和蔓繫黃團

山史

陳仲醇詩花枝送客蛙催鼓竹籟喧林鳥報更

吳旦生曰仲醇自言山鳥每至五更喧起五次謂之報更蓋山中真率漏聲也嘗居小崑山下適聞庭蛙請以節飲因題此聯可為山史實錄余按小崑山二

陸讀書處仲醇築臺其陰以棲隱焉少與董玄宰齊
名侍御某督學至華亭兩人各自許第一已而揭名
玄宰首仲醇在次遂裂儒衣冠焚之決計肥遯時年
二十有九自是名傾海內有山中宰相之目薦剡上
聞累辟不起四方造請其廬乞片札以引重者幾於
在陸滿車在水滿舟矣即下肆之一芒屨一粉簪無
不曰此眉公鞋眉公餅云

陳木叔贈眉公詩金馬有星仍字隱玉璫雖夢不能

臣潘木公極賞此二語余弱冠晤眉翁於南屏山寺
盤桓竟日因以詩投贈云仙家十賚陶弘景戰國一
人魯仲連翁謝不敢當

宣廟器

張士昌觀宣爐歌云吁嗟乎此爐不可狀南鑄北鑄徒
多樣曰除獸面象鼻與分襠戟耳魚耳斯為上又倪天
樞宣磁謡云燦然者磁識宣皇當年盛時陶器良饒土
凝雪骨薄剛如水泐光火則降又金聲觀宣廟漆器歌

云人工化工二俱有百年收藏長在手奴驅倭漆凡剔紅請為宣皇記考工

吳旦生曰器首宣廟之銅宣銅爐其首爐之製有辨焉色有辨焉款有辨焉製所取宜書室登几案入賞

鑒則莫若彝乳爐之口徑三寸者

其製百摺彝爐乳爐戟耳魚耳蛭蚰

耳薰冠象鼻獸面石榴足橘囊香奩花素方圓鼎等上也角端象頭鬲判官耳雞腿脚扁爐翻環六稜四方直脚爐漏空桶爐竹節分襠色種種面色二螭茶

索耳等下也釘耳補款者偽也

色永浸擦薰洗為之

有栗色有藏經紙有褐色有棠梨有茄皮鏤金色金

泥塗炙成之

有赤金霞片

覆手色二鷄皮紋色火氣久而

成者跡如鷄皮拂之實無跡也青綠硃斑色未經火

氣久而成也款亦製辨色辨之

陰印陽文真書大明宣德年製字完整地

光澤與爐色等

非經雕錯者

近有北鑄

以施家名

有蘇鑄

以甘家名

有南鑄

以甘家名

每以偽得真售然製即可偽也款即可偽也色

終不可為偽宣爐色黯然奇光在裏審視如膚肉內

色蘊火熱之彩爛善變偽者外光奪目內質理疏槁

然矣傳宣廟時內佛殿災金銀銅像渾而液因用鑄

器非也宣廟欲鑄爐問工銅何法煉而佳工奏煉至

六則現殊光寶色異恒銅矣上曰煉十二乃鑄也先

是永樂間鑄燒斑

耳多寬索腹多分襠

後是景泰成化間鑄

獅頭彝

厚赤金作雲鳥片帖鑄之款用藥燒景泰年製等字

質色製款無如宣

爐者其他宣器質色如爐也而入賞鑒則亞之次窰

器古曰柴汝官哥均定在今則永宣成正嘉萬官窰

其時饒土入地未惡其土骨紫白料法泐藥水法底

足火法花青畫彩法雅既入古緻又盡今故懸日無

多而購市重直傳世永寶焉永窰之壓手杯傳用可

久價直甚高

坦口折腰沙足滑底外深青花內雙獅球球內篆書永樂年製細如粒米鴛鴦

心次之花心次之

近者倣之以蠢厚約略形似耳宣窰之紅

魚髀杯

末西紅寶石塗魚形渤內燒出渤上寶紅凸起紫黑者火候失也

青花茶髀

杯

畫龍松梅

酒髀杯

畫人物海獸

硃砂小壺大碗

色紅鮮白鎖口

竹節

滴壺小壺匾確

皆罩蓋者

爐瓶盤碟敞口花尊蜜漬桶確

多五白壇

心有壇字

暗花白茶

龍窰肚釜底綿足裏有龍鳳暗花底有大明

宣德年製暗款

坐墩等

有漏花填彩有實花填彩皆深青地有藍地填彩有白地青花有冰裂紋

器式績事皆發古未有而橘皮紋起隱隱然他則水

注

五采桃注石榴注彩色雙瓜注雙鴛注鶯注

筆洗

魚藻洗葵瓣洗磬口洗螭洗

兩臺

燈檠雀食罐蟋蟀盆等成窰之葡萄髹杯五彩敞口匾肚草

蟲可口子母雞勸杯人物蓮子酒琖草蟲小琖青花

酒琖

薄纔如紙

齊筋小碟香盒小罐

皆五采者

嘉窰之青花五

彩二窰製器悉備有小白甌亦曰壇琖

醺壇用器內書茶酒棗湯

薑湯等字

三色魚匾琖

磬口饅心圓足

紅鉛小花合子等

大如錢有青花

有紅花 蓋永尚厚成尚薄宣青尚淡嘉青尚濃成青未

若宣青蘇淳泥青也宣彩未若成彩淺深入畫也嘉萬之回青特為幽菁隆窰之春宮不入鑒藏是其別已其同者汁水瑩厚如堆脂汁中稷眼有若蟹爪也質料膩實不易茅蔑也磨弄歲深火色退淨也今市所爭購多當年不中御用者其有龍紋五爪不落民間或碾去一爪而亦市之次漆器古犀毗剔紅戩金攢犀螺鈿市時時有而今則剔紅填漆倭漆三者剔紅宋多金銀為素今錫木為胎永樂中則果園廠製

合盤匣不一合有蔗段蒸餅河西三撞兩撞等式盤有圓方長八角繚環四角牡丹瓣等式匣有長方四方二撞三撞四式其法朱漆三十六次鏤以細錦底漆黑光

針刻大明永樂年製字

以比元作者

張成楊茂

劍環香草之式似為

過之宣德中製同永樂而特紅鮮

底用刀刻大明宣德年製填以金屑

偽造者用礬朱或灰團起外硃漆二層曰罩紅也填

漆刻成花鳥彩填稠漆磨平如畫久逾新也倭漆胎

輕漆滑鉛鈴口金銀片漆中金屑燦燦如飛金無少

渾暗

匣有圓三五七九子合有方四六九子匣其小合匣重止三分有三撞合有粉扇筆等匣有木鈹

有角 中土盡其技者稱蔣製倭漆與潘製倭銅焉正

統中楊塤之描漆汪家之彩漆

設色如畫用粉入漆久乃如雪或曰真珠

也粉隆慶中方信川之堆漆螺蚶黃平沙之剔紅人物

精采刀法圓滑雲南雕法雖細用漆不堅刀不藏鋒

稜不磨熟矣次紙墨紙不如舊墨不如新宣紙至薄

能堅至厚能膩箋色古光文藻精細有貢箋有綿料

式如榜紙大小方幅可揭至三四張邊有宣德五年造素馨紙印

後則有白箋

堅厚如板

兩面研有灑金箋有灑金五色粉箋有金花五色箋
光如玉

有五色大簾紙有磁青紙

堅韌如段素可用書泥金字

有藍紙

薄

能外則有薛濤蜀箋鏡面高麗箋松江譚箋新安倣

宋藏經箋等墨欲黑古墨色光如漆濃不湮沁淡不

脫神今其法不可得時御用內墨則宣廟之龍鳳大

定

青填金填大明宣德年製字別有朱藍紫綠等定

外則國初之查文通龍

忠迪

碧天龍氣水晶宮二種

方正

牛舌墨

蘇眉陽

卧蠶小墨

嘉萬之羅

小華

小道士等

汪中山

太極十種玄香太守四種客卿四種松滋侯四種

邵格之

方于魯

青麟髓等其子子封曰義蒼篆

程君房

玄元靈氣等方程墨各有譜

今之

潘嘉客

紫極龍光

潘方凱

開天容

吳名望

紫金霜

吳去塵

不可磨末

曾有

而市品價尤重者始方羅中方程今兩吳也其

為質輕烟細易松以桐易桐以脂烟百兩油三石今
五石矣茜染獨草今用剖矣若遂能取巨勝油烟徐
鉉李廷珪何足殊異哉見帝京景物畧

雌甲

申維烈贈曾弗人同庚詩雌甲幸同予共汝

吳旦生曰諧噓錄裴晉公在相位有人寄槐癭一枚

欲削為枕郎中庾威捧翫良久曰此是雌樹生者恐

不堪用裴曰郎中甲子多少庾曰某與令公同是甲

辰生公笑曰郎中便是雌甲辰

范石湖云夏月值甲子日雨以妨農為憂

老農云喜遇雙日是雌甲子雖雨無妨因考歲時雜占注云甲子值雙日多驗雙日少驗古詩云老尚誇雌甲狂寧作散仙蓋古人原有雌雄之說

廿年

申維烈詩廿年風雨隔胡牀

吳旦生曰入聲十四緝韻中載廿字詩家往往用二

十作廿蓋古文省便字也按說文廿人計切二十并也卅蘇省切三十并也卌先立反四十并也玉篇廿

如拾切卅先闔切

廣韻二十七合中音
跟二十八蓋又收

卌先入切容

齋隨筆云秦始皇凡刻石頌德之辭皆四字一句秦

山辭曰皇帝臨位二十有六年琅琊臺頌曰維二十

六年皇帝作始之衆頌曰維二十九年時在中春東

觀頌曰維二十九年皇帝春遊會稽頌曰德惠脩長

三十有七年此史記所載每稱年者輒五字一句嘗

得泰山辭石本乃書為廿有六年想其餘皆如是而
太史公悞易之或後人傳寫之訛耳其實四字句也
余觀國語云行玉廿穀正作此字顏之推稽聖賦中
山何夥有子百廿

犢鼻

尹子求登華山詩脫却深衣宜犢鼻攀來絕壁是猿身
吳旦生曰司馬相如傳身自著犢鼻褌滌器市中師
古注即今之褌之容反也形似犢鼻故名余按明堂圖

人身兩膝以下有穴名犢鼻西溪叢語云膝上二寸
為犢鼻穴蓋言禪之短僅至于此也甯戚南山歌短
布單衣適至胛老杜同谷歌短衣數挽不掩脰亦同
此意則顏師古韋昭之注皆悞留青日札云以三尺
布為之形如牛鼻蓋前後各一幅中裁兩尖襠交轉
即今之牛頭子禪一名梢子乃為農夫田衣而士人
無復服之者此說俚甚

顏俠客

茅止生咏顏俠客詩俠香不得狂飈颺猶是吳趨一酒人

吳旦生曰天啓間楊副院漣首暴瑠罪一時清流之禍緹騎四出周銓部順昌被逮民大譁顏佩章創義洵變手殺一校尉已而談笑入西市目當事曰我死而生諸公生而死矣同坐死者五人吳因之率衆葬之虎丘勒石曰五人之墓今歸然存也止生作二十八忠詩以表諸君子又作三奇詩顏其一也顏沈湛

里中鬪走技擊為雄卒之慷慨赴義賢於衣冠遠矣
止生為鹿門先生之孫年十歲吳興大祿太守陳幼
學議輸賑人囁嚅莫敢應止生垂髫奮袖請傾家廩
以濟荒太守嘆曰此異童子也長而好談兵進武備
志待詔翰林改授副總兵以罪遣戍因呼憤縱酒而
死于昭遠感述云氣滿揮戈遑駐日心傾指困遡駒
年又云北闕籌兵真武庫西曹謗篋似文淵

歷代詩話卷七十九

欽定四庫全書

歷代詩話卷八十

歸安吳景旭撰

癸集下之下

格律

陳卧子辱李司馬萍榘贈詩勉以世事兼許文筆云久
瞻樞府重明光投我連城雲錦章傷亂已聞劉太尉賞
音深愧蔡中郎九龍移帳春無草萬馬窺邊夜有霜蚤

晚滄江驚驛使詔書先問右賢王朱雲子論此詩曰三
四穩實五六巉秀方見配搭之妙向與卧子論李頎知
君官屬一篇章法濃淡音節頓挫之妙深夜相與歎息
可語格律者世無一二今閱卧子詩至此恍如當日

吳旦生曰卧子此詩起二句見司馬贈詩領聯之上
句見世事下句見文筆輕將題面收拾已過而頸聯
乃贊美司馬之辭結句又足成之卧子深于格律有
筋節有氣韻故為七字擅場此法從唐律中得來如

老杜奉送蜀州栢二別駕將中丞命赴江陵起居衛

尚書太夫人因示從弟行軍司馬位其起居云中丞

問俗畫熊頻愛弟傳書綠鷁新言栢中丞貞節遣弟別

駕將命而往也頷聯上句云遷轉五州防禦使言中

丞時為夔州都督也唐書夔州兼峽忠歸萬為五州下句云起居八

座太夫人言起居衛尚書伯玉之祖母也唐以六尚書左右僕

射合為八座頸聯云楚宮臘送荆門水白帝雲輸碧海春

乃是江陵與蜀州景語結句云與報惠連詩不惜知

吾斑鬢總如銀則及示從弟意矣如孫逖和左司張
員外自洛使入京中路先赴長安逢立春日贈韋侍
御及諸公其起句云忽覩雲間數鴈迴更逢山上一
花開第一句見使還第二句見立春也領聯云河邊
淑氣迎芳草林下輕風待落梅承第二句立春而言
也頸聯上句云秋憲府中高唱入言張之以詩贈韋
也下句云春卿署裏和歌來自言以此詩和張也結
句云共言東閣招賢地自有西征作賦才乃贊美張

公耳觀杜孫二詩極完整却又極貫串凡作長題而有數事者皆於此等詩細求之則首尾部位自然勻美而何有凌雜之患哉即以李頎一篇言之送李回起句云知君官屬大司農詔幸驪山職事雄言回侍從而往驪山也領聯上句云歲發金錢供御府是承第一句官司農而言也下句云晝看仙液注離宮是承第二句幸驪山而言也頸聯云千巖曙雪旌門上十月寒花輦路中是往驪山景語蓋此篇總以第二

句為主也結句云不覩聲明與文物自傷留滯去關東則頽之反而自道耳此等格律非盛唐何以有此

大長秋

陳卧子感懷詩羣臣多拜大長秋

吳旦生曰通典戰國時有宦者令秦有中謁者令丞漢灌嬰為中謁者後帝以閹人為之又有衛尉少府各一人漢景帝改

為大長秋或用中人或用士人成帝加置太僕一人掌太后輿馬通謂之皇太后卿又有長信長樂少府

職如長秋後漢大長秋常用宦者職掌奉宣中宮命

中宮出則從

師古云秋者收成之時長者恒久之義故以為皇后官名

漢書戾太

子傳夜入未央宮殿長秋門後漢書馬皇后傳有司

奏立長秋宮注請立皇后不敢指言故以宮稱之南

齊書秋宮亦遽軒景前虧梁書配德早終長秋曠位

隋書大長秋主諸宦者以司宮闈之職劉禹錫宮詞

云日晚長秋簾外報于鵲少年行云少年初拜大長

秋

鴈塞

陳卧子燕中雜詩鴈塞雲連陣龍沙月近樓

吳旦生曰燕中用鴈塞字卧子似未確核嘗見今人所用紫塞鴈門鴈塞皆混而稱之莫攷其地按古今注云秦築長城土色皆紫漢塞亦然故稱紫塞焉周興嗣千字文鴈門紫塞鮑昭蕪城賦北走紫塞杜甫詩蕭蕭紫塞鴈李頻詩秦地山河連紫塞是矣山海經云鴈門山鴈出其間在高柳北梁州記云梁州縣

界有鴈塞山傳言此山有大池水鴈棲集之因名鴈塞顧太初有鴈塞考最審實可據蓋云鴈門紫塞地皆在北今人稱北為鴈塞非也荊州記鴈塞北接梁州汶陽郡其間東西嶺屬天無際鴈飛翥至此即回翼惟一處稍下每鴈飛達則矯翮裁度下處而過故名鴈塞地在蜀漢間也

文無害

黃太穉讀周元立兩都詩有懷云更誰年少文無害有

客陽春和不多

吳旦生曰野客叢書謂蕭何以文無害為沛主吏掾
趙禹為丞相亞夫吏府中皆稱其廉平然亞夫不任
曰極知禹無害然文深不可居大府張湯給事內史
為甯氏掾以湯為無害言大府顏師古注無害言最
勝又曰傷害也言無人能傷害之者僕觀後漢百官
志秋冬遣無害都吏案訊諸囚注按律有無害都吏
如今言公平吏漢書音義曰文無所枉害蕭何以文

無害為沛主吏掾正如此也據此則文無害乃漢律
中語太穉用作讀詩贊美之辭未之考究爾如楊仲
弘詩慎密文無害詳觀獄有疑自是確當

成語

黃太穉寄懷三友其中二聯云以吾一日長乎爾如此
三星粲者何漢口帆從鸚鵡落荊州士比鯽魚多

吳旦生曰王直方詩話山谷嘗謂作詩使史漢間全
語為有氣骨後因誦孟浩然詩見以吾一日長異方

之樂令人悲及吾亦從此逝方悟山谷之言太穉正
得此意故用成語獨蒼然

北夢瑣言云江陵世號衣冠藪澤人言琵琶多如飯
甌措大多如鯽魚

串月

徐元歎串月詩金波激射難可擬玉塔倒懸聊近似塔
顛一月獨分明千百化身從此止

吳旦生曰蘇俗每歲八月十八夜士女凝粧挈壺壘

艤舟于橋畔首尾鱗比僅出篷窻以遲月蓋吳中盛
水水與月相吞孕凡區一水即各給一月望之纍纍
馬如編貝而成串謂之看串月故元歎詩序或云從
寶帶橋外出數有七十二此橫說也或云葑關外極
饒溪港是夜月出其方光影相傳望如塔燈此豎說
也薄暮登楞伽山坐靈官殿庭遠水縱橫昏昏莫辨
更餘孤魄漸升從溪港一一現形分身無數始大異
之二更後益奇總之所為玉塔者近是向之橫豎俱

不足言今取元歎之序與詩合觀之所謂串月宛在
行間矣

稻孫

單尊僧詩稻孫翻曉露鳩婦語晴煙

吳旦生曰番禺雜錄稻再生曰稻孫又米元章秋日
登無為州城樓宴集見田禾青青可愛問之老農云
稻孫也稻已獲得雨復抽餘穗元章喜而名其樓曰
稻孫樓今尊僧句用此

方瞳

陳百史詩赤瞳既獲老方瞳

吳旦生曰潜確類書李根兩目瞳子皆方云八萬歲
則瞳子方拾遺記老聃居山父老五人皆方瞳玉面
共談天地乃五方五行之精枕中書忽見一真人眼
瞳正方頂負圓光玉顏絕世東坡詩白髮何足道要
使雙瞳方楊仲弘詩已驚雙鬢短更待兩瞳方揭曼
碩詩方瞳綠鬢紅氍毹

仙書言陶通明晚年一眼有時而方搜神記偓佺兩目更方

支離

張鍾筠詩石拳磊亂排碁譜木叟支離負斧形

吳旦生曰研莊雜記鮮于伯機嘗於廢圃中得恠松一株移置所居齋前呼為支離叟朝夕撫翫以為適遂昌雜錄云僧溫日觀時至其家抱軒前支離叟或歌或笑其法中所謂散聖者其人也鍾筠用此

按莊子支離疏者願隱于齊肩高于頂會撮指天會撮

椎髻也

五管在上

五臟之管皆屬于背背曲僂則管在上也

兩髀為脇此數

句畫出馱子形狀蓋支離者偃僂也肢體不收拾之貌而鮮于取以名松必此松之盤屈而偃僂矣

春場

劉同人詩云楊柳活楊柳多小孩小女閒不過絲線結鞭鞭陀羅鞭陀羅陀羅起陀羅起鞭不已鞭不已陀羅死又詩云楊柳青兒手空鐘不暫停空鐘空鐘舒而遠

聽如蛞蝓起未觸于屏簫垂笛橫絲絃合併大人為政
小兒無此耐煩性又詩云倒掖器如甌落階瓶倒水勻
勻呼吸吹薄紙吸少呼多脫瓶底藏爹錢瞞爹眼裏迷
糊琉璃殿甸子兒迷糊倒掖器爹著汗嫵著淚

吳旦生曰楊柳活楊柳青皆燕人習俗語而同人采
之成咏也燕中兒謂之打拔按宋時寒食有拋堦

之戲兒童飛瓦石之類也謂起于堯民之擊壤

古童兒所

戲之器非土壤也風土記云以木為之前廣後銳長
尺三寸其形如履先側一壤于地遙于三四十步外

以手中環擊之中者為上梅聖俞詩窈窕踏歌相把袂輕浮賭勝

各飛塤切禾禾蓋同人與宛平于奕正蒐事搗辭著帝

京景物略一書可為采風之助如春場一帙附載十
二月事例詳善有致堪與荆楚歲時記並傳

帝京景物略云東直門外五里為春場場內春亭萬
厯癸巳府尹謝杰建也故事先春一日大京兆迎春
旗幟前導次田家樂次勾芒神亭次春牛臺次縣正
佐耆老學師儒府上下衙皆騎丞尹興官皆衣朱簪

花迎春自場入于府是日塑小春牛芒神以京兆生
舁入朝進皇上春進中宮春進皇子春畢百官朝服
賀立春候府縣官吏具公服禮勾芒各以綵仗鞭牛
者三勸耕也退各以綵仗贈貽所知按造牛芒法日
短至辰日取土水木於歲德之方木以桑柘身尾高
下之度以歲八節四季日十有二時踏用府門之扇
左右以歲陰陽牛口張合尾左右繳芒立左右亦以
歲陰陽以歲干支納音之五行三者色為頭身腹色

日三者色為角耳尾為膝脛為蹄色以日支孟仲季
為籠之索柳鞭之結子之麻苧絲牛鼻中木曰拘脊
子桑柘為之以正月中宮色為其色也芒神服色以
日支受尅者為之尅所尅者其繫色也歲孟仲季其
老壯少也春立旦前後五日中者是農忙也過前農
早忙過後農晚間也而神並乎牛前後乎牛分之以
時之卯後八曰燠亥後四曰寒為罨耳之提且戴以
日納音為髻平梳之頂耳前後為鞋袴行纏之懸著

有無也田家樂者二荆籠上著紙泥鬼判頭也又五
六長竿竿頭縛髀如瓜狀見僧則捶使避匿不令見
牛芒也又牛臺上花繡衣帽扮四直功曹立而兒童
瓦石擊之者樂工四人也考漢郊祀志迎春祭青帝
勾芒青車旗服歌青陽舞雲翹立青幡百官衣皆青
郡國縣官下至令史服青幘今者朱衣唐制立春日
郎官御史長貳以上賜春羅幡勝宰臣親王近臣賜
金銀幡勝入賀帶歸私第民間翦綵為春幡簪首令

惟元旦日小民以髻穿烏金紙畫綵為鬧蛾簪之
正月元旦五鼓時不卧而嚏嚏則急起或不及衣曰
卧嚏者病也不卧而語言或戶外呼則不應曰呼者
鬼也夙興盥漱啖黍糕曰年糕家長少畢拜娣友
投箋互拜曰拜年也燒香東嶽廟賽放砲杖紙且寸
東之琉璃廠店西之白塔寺賣琉璃瓶盛朱魚轉側
其影小大俄忽別有銜而噓吸者大聲咏咏小聲啍
啍曰倒掖氣旦至三日男女於白塔寺遶塔旦至晦

日家家竿標樓閣松栢枝蔭之夜燈之曰天燈是月也女婦間手五丸且擲且拾且承曰抓子兒丸用象木銀礫為之競以輕捷八日至十八日集東華門外曰燈市貴賤相還貧富相易貿人物齊矣婦女著白綾衫隊而宵行謂無腰腿諸疾曰走橋至城各門手暗觸釘謂男子祥曰摸釘兒擊太平鼓無昏曉跳百索無稚壯戴面具耍大頭和尚聚觀無男女有以詩隱物幌於寺壁者曰商燈立想而漫射之無靈蠢十

一至十六日鄉村人縛秫秸作棚周懸雜燈地廣二畝門徑曲黠藏三四里入者誤不得逕即久迷不出曰黃河九曲燈也十三日家以小錢一百八枚夜燈之徧散井竈門戶砧石曰散燈也其聚如螢散如星富者燈四夕貧者燈一夕止又甚貧者無燈小兒共以繩繫一兒腰牽焉相距尋丈迭於不意中拳之以去曰打鬼不得為繫者兒所執執者闕然共捉代繫曰替鬼更繫更擊更執更代終日擊不為代則佻巧

矣又繩以為城二兒帕蒙以摸一兒執敲城中輒敲一聲而輒易其地以誤之為摸者得則蒙執敲兒曰摸蝦兒望前後夜婦女束草人紙粉面首帕衫裙號稱姑娘兩童女掖之祀以馬糞打鼓歌馬糞薶歌三祝神則躍躍拜不已者休倒不起乃咎也男子衝而仆十九日集白雲觀曰耍燕九彈射走馬馬廿五日大啖餅餌曰填倉

二月二日曰龍臺頭煎元旦祭餘餅薰沐炕曰薰蟲

兒謂引龍蟲不出也燕少蜈蚣而蠍其為毒倍焉少
蚊而蠅其為擾倍焉蚤虱之屬臭蟲又倍焉所苦尤
在編戶雖預薰之實未之除也小兒以木二寸製如
棗核置地而棒之一擊令起隨一擊令遠以近為負
曰打拔拔古所稱擊壤者耶其謠曰楊柳兒活抽陀
螺楊柳兒青放空鐘楊柳兒死踢毬子楊柳發芽兒
打拔兒空鐘者剡木中空旁口盪以瀝青卓地如仰
鐘而柄其上之平別一繩繞其柄別一竹尺有孔度

其繩而抵格空鐘繩勒右却竹勒左却一勒空鐘轟而疾轉大者聲鐘小亦蛞蝓飛聲一鐘聲歇時乃已製徑寸至八九寸其放之一人至三人陀螺者木製如小空鐘中實而無柄繞以鞭之繩而無竹尺卓於地急掣其鞭一掣陀螺則轉無聲也視其緩而鞭之轉轉無復住轉之疾正如卓立地上頂光旋旋影不動也

三月清明日男女掃墓擔提尊榼轎馬後掛楮錠粲

粲然滿道也拜者酹者哭者為墓除草添土者焚楮
錠次以紙錢置墳頭望中無紙錢則孤墳矣哭罷不
歸也趨芳樹擇園圃列坐盡醉有歌者哭笑無端哀
往而樂回也是日簪柳遊高梁橋曰踏青多四方客
未歸者祭掃日感念出遊廿八日東嶽仁聖帝誕傾
城趨齊化門鼓樂旗幢為祝觀者夾路是月小兒以
錢泥夾穿而乾之別錢泥片片錢狀字幕備具曰泥
錢畫為方城兒置一泥錢城中曰小兒拈一泥錢遠

擲之曰撒出城則負中則勝不中而指杈相及亦勝指不及而猶城中則撒者為矧其勝負也以泥錢別有挑用葦紉用指者與撒略同有撒用泥丸者與錢略同而其畫城廓遠

四月一日至十八日傾城趨馬駒橋幡樂之盛一如嶽廟碧霞元君誕也立夏日啓冰賜文武大臣編氓得賣買手二銅盞疊之其聲磕磕曰冰盞冰著濕乃消畏陰雨天以綿衣蓋護煥乃不消八日捨豆兒曰

結緣十八日亦捨先是拈豆念佛一豆佛號一聲有
念豆至石者至日熟豆人徧捨之其人亦一念佛啖
一豆也凡婦女不見答於夫姑婉若者婢妾擯於主
及姥者則自咎曰身前世不捨豆兒不結得人緣也
是日要戒壇遊香山玉泉茶酒棚妓棚周山灣澗曲
聞初說戒者先令僧了願如是今不說戒百年而年
則一了願是月榆初錢麪和糖蒸食之曰榆錢糕
五月一日至五日家家妍飾小閨女簪以榴花曰女

兒節五日之午前羣入天壇曰避毒也過午出走馬壇之牆下無江城繫絲投角黍俗而亦為角黍無競渡俗亦競遊要南則要金魚池西要高梁橋東松林北滿井為地不同飲醪熙遊也同太醫院官旗物鼓吹赴南海子捉蝦蟇取蟾酥也其法針棗葉刺蟾之眉間漿射葉上以蔽人目不令傷也漬酒以菖蒲插門以艾塗耳鼻以雄黃曰避蟲毒家各懸五雷符簪佩各小紙符簪或五毒五瑞花草項各綵繫垂金錫

若錢者若鎖者曰端午索十三日進刀馬於闕帝廟
刀以鐵重八十觔紙馬高二丈鞍韉繡文轡銜金色
旗鼓頭踏導之

六月六日曬鑾駕民間亦曬其衣物老儒破書貧女
敝縕反覆覲日光晡乃收三伏日洗象錦衣衛官以
旗鼓迎象出順承門浴響閤象次第入於河也則蒼
山之頽也額耳昂回鼻舒糾吸噓出水面矯矯有蛟
龍之勢象奴挽索據脊時時出沒其髻觀者兩岍各

萬衆面首如鱗次貝編焉然浴之不能須臾象奴輒
調御令起云浴久則相雌雄相雌雄則狂

七月七日之午丟巧針婦女曝盎水日中頃之水膜
生面繡鍼投之則浮則看水底鍼影有成雲物花頭
鳥獸影者有成鞋及剪刀水茄影者謂乞得巧其影
粗如槌細如絲直如軸蠟此拙徵矣婦或歎女有泣
者十五日諸寺建盂蘭盆會夜於水次放燈曰放河
燈最勝水闕次泡子河也上墳如清明時或製小袋

以往祭甫訖輒於墓次掬促織滿袋則喜秫竿肩之
以歸是月始鬪促織壯夫士人亦為之鬪有場場有
主者其養之又有師鬪盆簫確無家不貯焉立秋日
相戒不飲生水曰呷秋頭水生暑痹子

八月十五日祭月其祭果餅必圓分瓜必牙錯辦刻
之如蓮華紙肆市月光紙續滿月像趺坐蓮華者月
光徧照菩薩也華下月輪桂殿有兔杵而人立搗藥
臼中紙小者三寸大者丈綴工者金碧繽紛家設月

光位於月所出方向月供而拜則焚月光紙徹所供散家之人必徧月餅月果戚屬餽相報餅有徑二尺者女歸寧是日必返其夫家曰團圓節也

九月九日載酒具茶爐食榼曰登高香山諸山高也法藏寺高塔也顯靈宮報國寺高閣也釋不登賃園亭闔坊曲為娛耳麪餅種棗栗其面星星然曰花糕糕肆標紙綵旗曰花糕旗父母家必迎女來食花糕或不得迎母則詬女則怨詫小妹則泣望其姊姨

亦曰女兒節

十月一日紙肆裁紙五色作男女衣長尺有咫曰寒衣有疏印緘識其姓字輩行如寄書然家家脩具夜奠呼而焚之其門曰送寒衣新喪白紙為之曰新鬼不敢衣綵也送白衣者哭女聲十九男聲十一是月羊始市兒取羊後脰之膝之輪骨曰貝石置一而一擲之置者不動擲之不過置者乃擲置者若動擲之而過勝負以生其骨輪四面兩端凹曰真凸曰詭勾

曰騷輪曰背立曰頂骨律其頂岐亦曰真平亦曰詭
蓋真勝詭負而騷背間頂平再勝頂岐三勝也其勝
負也以貝石

十一月冬至日百官賀冬畢吉服三日具紅箋互拜
朱衣交於衢一如元旦民間不爾惟婦製履舄上其
舅姑日冬至畫素梅一枝為辦八十有一日染一辦
辦盡而九九出則春深矣曰九九消寒圖有直作圈
九叢叢九圈者刻而市之附以九九之歌述其寒燠

之候歌曰一九二九相喚不出手三九二十七籬頭
吹簫築四九三十六夜眠如露宿五九四十五家家
堆鹽虎六九五十四口中咽暖氣七九六十三行人
把衣單八九七十二猫狗尋陰地九九八十一窮漢
受罪畢纔要伸脚睡蚊蟲蠅蚤出

十二月一日至歲除夜小民為疾苦者奉香一尺宵
行衢中誦元君號自述香願其聲烏烏惻惻曰號佛
行過井過寺廟則跪且拜而誦香盡尺乃歸八日先

期鑿冰方尺至日納冰窖中鑑深二丈冰以入則固之封如阜內冰啓冰中涓為政凡蘋婆果入春而市者附藏焉附乎冰者啓之如初摘於樹離乎冰則化如泥其害在安定門及崇文門外是日家效庵寺豆果雜米為粥供而朝食曰臘八粥廿四日以糖劑餅黍糕棗栗胡桃炒豆祀竈君以糟草秣竈君馬謂竈君翌日朝天去白家間一歲事祝曰好多說不好少說記稱竈老婦之祭今男子祭禁不令婦女見之祀

餘糖果禁幼女不令得啖曰啖竈餘則食肥膩時口
圈黑也廿五日五更焚香楮接玉皇曰玉皇下查人
間也竟此日無婦嫗詈聲三十日五更又焚香楮送
迎送玉皇上界矣迎新竈君下界矣插芝蔴楷於門
簷竈臺曰藏鬼楷中不令出也門牕貼紅紙葫蘆曰
收瘟鬼夜以松栢枝雜柴燎院中曰燒松盆煇歲也
懸先亡影像祀以獅仙斗糖蔴花餽枝染五色葦架
竹罩陳之家長幼畢拜已各自拜曰辭歲已聚坐食

飲曰守歲是月小兒及賤間人以二石韋置前先一人踢一令遠一人隨踢其一再踢而及之而中之為勝一踢即著焉即過焉與再踢不及者同為負也再踢而過焉則讓先一人隨踢之其法初為趾踵苦寒設今遂用賭如博然有司申禁之不止也

凡歲時不雨家貼龍王神馬於門磁瓶插柳枝掛門之傍小兒塑泥龍張紙旗擊鼓金焚香各龍王廟羣歌曰青龍頭白龍尾

聲作以

小孩求雨天歡喜麥子麥

子焦黃起動起動龍王天下小下初一下到十八聲

作

巴摩訶薩初雨小兒羣喜而歌曰風來了雨來了禾

場背了穀

聲作古

來了雨久以白紙作婦人首翦紅綠

紙衣之以苕帚苗縛小帚令攜之竿懸簷際曰掃晴

娘日月蝕寺觀擊鐘鼓家擊盆盎銅鏡救日月聲嘈

嘈屯屯滿城中蝕之刻不飲不食曰生噎食病幼兒

見新月曰月芽兒即拜篤篤祝乃歌曰月月月拜三

拜休教兒生疥小兒遺溺者夜向參星叩首曰參兒

辰兒可憐溺淋人兒見流火則啐之曰賊星夜不以
小兒女衣置星月下曰女怕花星照兒怕賊星照亦
不置洗濯餘水為夜遊神飲馬也曰不當價

如吳語云罪過

初聞雷則抖衣曰蚤虱不生見霓曰杠戒莫指謂生
指頂瘡曰惡指也初雪戒不入口曰毒再雪則以炖


茶積雪以塑於庭燕舊有風鳶戲

俗曰毫兒

今已禁風則

剖秫稽二寸錯互貼方紙其兩端紙各紅綠中孔以
細竹橫安秫竿上迎風張而疾趨則轉如輪紅綠渾

渾如暈日風車



歷代詩話卷八十